

**Ilulissani Timersornermut ilinniarfimmik imaluunniit Ilinniarnertuunngorniarfimmik pilersitsoqarnissaa siunertaralungu Naalakkersuisut misissuinissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasorta q Knud Fleischer, Kattusseqatigiit Partiiat)

**Akissuteqaat**

(Ilinniartitaanermit, Ilisimatusarnermit Nunanullu Avannarlernut suleqateqarnermit Naalakkersuisoq)

**Siullermeerneqarnera**

Naalakkersuisut sinnerlugit Inatsisartuni ilaasorta q Knud Fleischer, Kattusseqatigiit Partiiat, qujassuteqarfigerusuppara siunnersuuteqarsimammat Ilulissani Timersornikkut Ilinniarfimmik imaluunniit ilinniarnertuunngornianut ilinniarfimmik pilersitsisoqarsinnaanissaa siunertaralungu Naalakkersuisut pilersitsisoqarsinnaanissaanik tunngavissaqarnersoq misissueqqullugit Inatsisartut aalajangiinissaanik siunnersuuteqarsimammat.

Inatsisartut upernaakkut ataatsimiinneranni matumani kingusinnerusukkut sammisussaassavarput ilinniartitaanikkut periusissaa. Tassuuna erserpoq, anguniarneqartoq 2025-mi inuusuttut ukioqatigiiaat 30-t inorlugit ukioqartut 70%-ii inuussutissarsiutigisinnaasaminnik allagartaqarlutik ilinniagaqalersimanissaat anguniarneqartoq. Tamanna iluatsinneqarsinnaassappat inuusuttut suli maannamiit amerlanerusut ilinniakkaminnik aallartitsisimasariaqarput, taamaattumillu aamma isumagisariaqarlutigu ilumut ilinniarfissat naammattut tamanna sioqqullugu pigilersinneqarsimanissaat, tamatumani illutassaat piinnarnagit kisiannili aamma pitsaassutsimikkut naamaginarturnik pissuseqartut neqeroorutigineqarsinnaanissaat. Taamaattumik aamma 2025-mi anguniagassagut piviusunngortissagutsigit ilinniarnertuunngorniarfinni inissat suli amerlanerusut pigilertariaqarpagut. Tamanna imatut paasineqassanngilaq ilumut ulloq manna tikillugu ilinniartitaanerit ingerlanneqartut illutaallu, massakkutuulli atorineqartuaannarnissaat takorloorneqartoq, tassami pisariaqartitsinerit aamma inuiaqatigiinneersut allanngoriartortuartarput, taamaattumillu maannangaaq eqqoriaruminaassinnaalluni siunissaaq ungasinnerusoq eqqarsaatigalugu qanoq isikkoqarumaassanersut.

Ilinniarnertuunngorniarfiit nutaamik aaqquussiffigineqarsimanagerat ilutigalugu, periarfissaalersimavoq inuusuttut ilinniarnerminni sammisassanik amerlanerusunik neqeroorfigineqarsinnaalernissaat, piginnaasani assigiinngisitaartuni immikkut ilisimasaqalersinnaanissaat siunertaralugu. Tamatumani aamma ilaavoq timersorneq. Tassami ilinniarfiit massakkut ingerlareersut akornanni peqqissuunissamat aammalu immikkut soqutiginarturnik ingerlatsisoqarnissaanik neqerooruteqarsinnaalereersimapput, tamatumani ilu timersorneq pingaaruteqartut inissinneqarsimalluni. Soorlu assersuutigalugu Sisimiuni imatut qulequtsikkamik neqerooruteqartoqartalersimavoq: ”Timersorneq issittumilu qaqqani inuuneqarneq”. Taamaattumik aamma timersornermik ilinniarfimmik ilinniarnertuunngorniarfiup immikkoortortaarfianik pilersitsisoqarsinnaanera pissusissamisoorinnaavoq. Tamatuma kingunerisaanik periarfissiissutigineqarsinnaassaaq

ilaatigut timersornerup tungaatigut immikkut neqerooruteqartalersinnaalernissaq, tamannalu misissuiffigineqassaaq. Kisiannili aamma ilanngutinngitsoorneqarsinnaanngilaq, atuarfiit ataasiakkaat periarfissaqartarmata, ilinniagaqartut avatangiisillu pisariaqartitaat tunngavigalugit ilusilersukkanik neqeroorutigisinnaasaminnik, taamaattumillu aalajangersimasunut immikkut neqerooruteqartarnissamik pituttorneqarnissaat pissusissamisuussanani. Assersuutigalugu tulluartsorinarsinnaavoq, Ilulissani ilinniarnertuungorniarfimmik pilersitsinermut atatillugu pisariaqartitsisoqarlunilu pissusissamisoorsinnaasorinarsinnaanera taavani SPS-ip inissisimanera iluatsillugu isumaginninnermut sammiveqartunik GU-mi sammisaqartitsisoqartarsinnaanissaa.

Ilinniarnertuungorniarfinni atuartitsinerni periarfissat suusinnaanersut misissuilluortoqarneratigut aamma piffinni sutigut pisariaqartitsisoqarnerseq isiginiarneqanngitsoorsinnaanngilaq. Tamatumanilu periarfissaalluarpoq atuarfiup avatangiiserisallu imminnut ikorfartoqatigiissinniarnissaat, soorlu ilinniartitaanerup peqqissuunissallu inuiaqatigiillu ingerlaaseqarnerminni pisariaqartitaat imminnut ikorfartoqatigiittussanngorlugit.

Taamatut Naalackersuisut sinnerlugit oqaaseqarlunga oqariartuuteqarninni, siunnersuutip ilassilluarneqarnera naqissusiivigaara.